

## Barweetaab Taayta nyēbo Yoowaana

*Taayta*

**Siriintēēt, yēē /kikēēsirē āk wōlēē /kikēēsirēē:** / Kikēēkuurē kaametiitaab lēbkēēyiintēēt Yoowaana kule Sālōōmē ānki cheebkaametiitaab Maaryaa nyoo ki kaametiitaab Yēesu (kas Mataayo 27:56; Māārkō 16:1; Yoowaana 19:25). Ki inee, Yāākōbō nyoo ki ng'eetaabkaametiitaab Yēesu āk Bētērō, ām rubiik chuut, :chēē ki lēēkitēē Yēesu. Kisir :Yoowaana barwaani ankusir subak kitaabuutaab lōkōōywēk chēē kāroomēch āk nyēbo Ng'oong'uutyēēt. Ānkoo manaatwech :bārōōnōōchu kule siriintēēt :ng'oo, tookunoot :wōlēē bēētooy :ng'aleekaab bārōōnōōchuutēchu kule kerkeey āk choo bo kitaabuutaab lōkōōywēk chēē kāroomēch kuu wōloo kisirta :Yoowaana kule siriintēēt akeenke :nyēē kisirē tukul. Chāmchiintōōs mbo :booyik choo kisimkunam ng'ālyoontēētaab Yēyiin kule kisirē :Yoowaana tukul. /Kikēēsirē bārōōnōōchu tukul ku sōmōk ām bārooyinto akeenke nto yooto ku yoo kikiikuriik kumēēchi keey :Yoowaana ām kwēēnuutaab kēnyiitaab 85 āk 95 KK. Imuuchē kukisirē :Yoowaana bārōōnōōk āk kitaabuut nyēbo lōkōōywēk chēē kāroomēch kumiitē kiriinkēētaab Ēfēēsō ām Eesya nyoo Mining' (Uturuki) wōlēē kichokōōtēryēēkyi :inee bēsyōōsyēkaab soboonnyii ku kāāntōōyiin nyēē koonyitoot miisin ām biikaab Kiriistō.

**Kiyēē mii āriit āk nyēē āmu:** Kimāchē :Yoowaana ām barwaaninyii kōōkomkoom biiko choo kāsē lōkōōywekyii, kulēēkitiit :tilyaanateeng'waa āk Yēyiin ānkuchoomnyo :icheek nkit. Mwoochinē mbo subak kule kuriibēē keey wōlēē mii :kānēētutēk chēbo lembech choo māchāmchiintōōs kule / kikēēsich Yēesu kuu chii ankume ku chii. / Kēēmwooyē mbo subak kule kiwuu nyēē ki chii :Yēesu nteenee ki tāmirmiryēēt kubooyiit man. Nto subak, / kēēmwooyē mbo kule king'eetee bōōrnyii nyoo chii / kumānāābokēēkwertoochi murtooywoontēēt. Tooku mbo subak kule mii :Yoowaana kōōboorchinē biiko kule kuriibēē keey ng'oomng'ookik, nto chooto ku kānēētikaab lembech choo kimwooyootē kule ng'ālyoo nyēbo kwōng'uut yoo tinyē :chiitaab Kiriistō ng'oomnānēēt nyēbo man. Kunyoo kimwooyē :bichoo kule kābo kiyēē kayeyee :chii bōōrto. Kimā ng'ālyoo nyēbo koomānuut yoo kāminy :chii ām soboon nyēē mā chuulaat ānkoo ku chiitaab Kiriistō. Mwooyē :Yoowaana kutook kule ng'wiinyan :ng'aleekaab ng'oomnānēēt choo inēētē :kānēētikaab lembech. Nteenee chōōnēē :ng'oomnānēēt nyēbo man wōlēē miitē :Tāmirmiryēētaab Yēyiin. Ibooru :Yoowaana kule ki chii kubooyiit man :lakwataab Yēyiin nyoo wēētii kibchuulyo. Ikiimē mbo subak ng'aleekaab chamateet, nyooyeetaab kaat, /kyoomchiin āmit, /kiibēl ng'ōōkisto, kutinyē :chiito manta kule / kiirāroochē, tiliilinto āk soboontaab kibchuulyo.

*Ng'ālyoontēētaab soboonto*

<sup>1</sup> Ng'ālyoontooni kyoomwook :acheek ku nyēē kimii /kumānāākēētoow kōōrēēt. Kikeekasaanu Ng'ālyoontooni ām yiitiikyoo ankeekasee mbo koonyekyoo, kiirōōtootē ānkēētiinyēē āwunnyēkyoo. Ng'ālyoontooni ku ng'ālyoontēētaab soboonto.

<sup>2</sup> Kichō :Soboonto. Kiboonto keyy :Soboonoo āk Baaba Yēyiin. Kōōkōōyookwēēch :Baaba Soboonoo. Kikeekas Soboonooto ānkēēng'āloolēē. Sobooni-itēnyi ku soboontaab kibchuulyo nyēē kyoomwook.

<sup>3</sup> Kyoomwook nkakweek kiyēē kookeekas sōōyēku akweek akeenke āk acheek kuu yoo kēēyēku :acheek akeenke āk Baaba ākoo Lakwanyii, Yēesu Kiriistō.

<sup>4</sup> Kēēsirwook si yoo koorub ng'aleechu, kuyitita :ng'erekweekwook.

*Māchāktōōs kēēbēēsyētootēē lēbkēēyyēēt*

<sup>5</sup> Lōkōōywēk chēē kookeekas kukwaanee wōlēē mii :Yēesu chu kēēmiitē kēēmwoowook ku kule, lēbkēēyyēēt :Yēyiin. Māmii :mēēnān wōlēē mii :Yēyiin.

<sup>6</sup> Yoo kēēyēyē keyy kule kēēyēku akeenke āk Yēyiin ānkutākēēbēēsyētootēē mēēnān, kēēmiitē ki-ibērbēēriisyē āmākēērubē ng'aleekaab manta.

<sup>7</sup> Nteenee yoo kēēbēēsyētootēē lēbkēēyyēēt, kuu yoo mii :Yēyiin lēbkēēyyēēt, kēēyēku kiito akeenke ānkōōwuuntoowēēch :korotiikaab Yēesu ng'ōōki ake tukul.

<sup>8</sup> Yoo yibē keey :chii kule māyēyē ng'ōōki ake tukul, kōōbērbēērē keey :nyoo anku manaanam ng'ālyoontēētaab manta.

<sup>9</sup> Nto yoo kāchāmchiin :chii kule kiikuyey ng'ōōki, kunyōōchinē :Yēyiin kaat ānkōōtiliilē ām tukuuk tukul choo māchurtootiin, kuuyu churtaat :Yēyiin / ānkiikoosēē keey.

<sup>10</sup> Nto yoo yibē keey :chii kule manaayey ng'ōōki ake tukul, kumiitē kumwooyē kule ng'wiin :Yēyiin amanaanam ng'ālyoontēēnyii.

## 2

<sup>1</sup> Biikyuu choo āchāmē, āsirwook ng'aleechu simōōchoolwookēn. Nto yoo kāchoolwookēn :chii, kung'ālooltoowēēch :chiito ake nyēē ming'tooy keey Baaba. Nyooto ku Yēēsu Kiriistō nyoo churtaat.

<sup>2</sup> Kiikooyto :Yēēsu soboonnyii sukoomuuch :Yēyiin kunyōōwēēch kaat ām choolwookātēēnyoo. Mēēbērē choolwookātēēnyoo acheek baateey, nteenee choolwookātēētaab chii ake tukul.

*Māchāktōōs kēērubē kiyēē mwooyē :Yēyiin*

<sup>3</sup> Yoo sikiinkēt man kule kēēbooyē Yēyiin, ku yoo kēērubē kiyēē mwooyē.

<sup>4</sup> Chii nyoo mwooyē kule, “Ābooyē :anii Yēyiin,” āmēēbērē yēyē kiyēē mākyinē :Yēyiin ku ng'wiin :chiichoo āmāboonto manta.

<sup>5</sup> Nteenee chii nyoo karub ng'ālyoontēētaab Yēyiin kukaakucham :chiichoo Yēyiin kuchurta.

Kēēliitēnyi :nyēē iboorwēech kule kēēyēku akeenke āk Yēyiin.

<sup>6</sup> Chii ake tukul nyoo mwooyē kule kiikunoom-nyo āk Yēyiin kumāchāktōōs kōōbuurē kuu wōloo kiibuurtooy :Yēēsu.

*Māchāktōōs kēēchoomtōōsii*

<sup>7</sup> Chōōrōōnuutēkyuu choo āchāmē, mākuutyēēt nyēē āmiitē āsirwook kumēēbērē nyēē lēēl, nteenee bo :mākuutyooni kēny ānku nyoo kyookasaanu.

<sup>8</sup> Nteenee, mii :kiy nyēē lēēl mākuutyooni nyēē āmiitē wāāsirwook. Imuuchē keekaaman mākuutyooni kuu wōloo kiyēytooy :Yēēsu, kuuyu mii kubotē :mēēnānēēt ānkumii kutooku :lēbkēēyyēēt nyēbo man.

<sup>9</sup> Chii ake tukul nyoo yibē keey kule mii lēbkēēyyēēt, ānkuwēchē ng'eetaabkaamet, tākumii :nyoo mēēnān.

<sup>10</sup> Nto nyoo chāmē ng'eetaabkaamet, kumii :nyoo lēbkēēyyēēt āmāyēyē biiko kuchuunnyēē Yēyiin.

<sup>11</sup> Nteenee, nyoo wēchē ng'eetaabkaamet, kumii :nyoo mēēnān ānkuwēēsyētootē kibtuuy ma. -Mēēnkētē wōlēē wēētii, kuuyu kaker :mēēnānēēt koonyekyii.

*-Mōōchāmē tukuukaab kōōrooni*

<sup>12</sup> Āsirwook akweek lēēkōōk kuuyu kōōkunyoōwook :Yēyiin kaat ām ng'ōōkiswookikwook, kubununēē kaayneetaab Yēēsu.

---

**2:5** Yoowa. 14:15; 1Yoowa. 2:17; 5:3; 2Yoowa. 6      **2:6** Yoowa. 13:15; 15:4-5      **2:7** 1Yoowa. 2:24; 3:11      **2:8** Yoowa. 13:34      **2:8** Yoowa. 8:12; Room. 13:12      **2:9** 1Yoowa. 3:10, 15; 4:20      **2:12** Yēyuut. 4:12; 1Yoowa. 3:5

13 Āsirwook akweek booyik kuuyu ōnkētē Yēesu nyoo kimii /kumānāākēētoow kōōrēēt.

Āsirwook akweek āybēeriik kuuyu kyōōsyēēntē Kibrōkōsyoontēēt.

Kāāsirwook akweek, lēēkōōk, kuuyu ōnkētē Baaba.

14 Kāāsirwook akweek, booyik kuuyu ōnkētē Yēesu nyoo kimii /kumānāākēētoow kōōrēēt.

Kāāsirwook akweek āybēeriik kuuyu ōkichootiin ankyoonam ng'ālyoontēētaab Yēyiin ānkyōōsyēēntē Kibrōkōsyoontēēt.

15 Biikyuu, -moocham tukuukaab kōōrooni. Chii ake tukul nyoo yēētyinē keey tukuuchu, kumāchāmē :nyoo Baaba.

16 Mākwoonēē :tukuuchoo wōlēē mii :Baaba, nteenee bo kōōrooni. Tukuuchoo ku muchas-taab bōōrto, kiyēē chōrōkyinē :koonyekuuk ākoo mēēnātēēt.

17 Bēku :kōōrooni āk muchas nyēbo keel ake tukul, nteenee, chii nyoo yēyē kuu wōloo māktooy :Yēyiin, kuboonto :nyoo \*soboontaab kibchuulyo ākookoy.

### *Ōriibēē keey biiko choo kwiilē Kiriistō*

18 Biikyuu, bēsyōōsyēk :chu chēbo tiing'āt. Ābērē kyookas kule mākuchō :Kwiiliintēētaab \*Kiriistō nyēē wōō. Mii :biiko wōlēē wōō mbo kuunyiitēnyi kukwiilē Kiriistō. Ng'ālyoontooniitēnyi :nyēē ki-inkētēē kule bēsyōōsyēk :chuutēchu chēbo tiing'āt.

19 Kiibetyeenyee keey :bichoo wōlēē kēēmiitē ānkubēēchi keey. Nteenee ākoo kimā chēēchoo man :bichoo kuuyu nto ki chēēchoo, nto mēēbērē

kibākooktēēch. Nteenee, kiiboorwēēch :wōlēē kibeeta kule kimāmii mbo :akeenke ām bichooto nyēē ki nyēēnyoo.

<sup>20</sup> Nteenee kiikung'aabeenaak akweek :Yēesu Tāmirmiryēēt ānkōōsēwunootiin :tukul.

<sup>21</sup> Mēēbērē āmiitē āsirwook kuuyu -mōōnkētē manta, nteenee āsirwook kuuyu ōnkētē. Nto subak ōnkētē kule māmii :ng'ālyoo nyēbo ng'wiiynan nyēē chōōnēē manta.

<sup>22</sup> Ng'wiintēēt ku ng'oo? Ng'wiintēēt ku nyoo mwooyē kule mā Kāārārookiintēēt :Yēesu nyoo ki-iyooku :Yēyiin. Kwiliintēētaab Kiriistō :nyoo nyēē tāyē Baaba āk Lakwanyii.

<sup>23</sup> Chiito :nyēē tāyē Leekweet kukaakutay nki-nee Kwaan. Nto nyoo chāmē Leekweet kuchāmē nkinee Kwaan.

<sup>24</sup> Māchāktōōs okas kule koonamte mēt kiyēē kyookasaanu kuchakee kēny. Yoo koonamte mēt, +mōōtēbunēē komostaab Leekweet āk Baaba.

<sup>25</sup> \*Soboontaab kibchuulyo :nyiiṭēnyi nyoo / kikēēkuurtoowēēch.

<sup>26</sup> Āmiitē āsirwook ng'aleechu kurubta keyy biiko choo syēēmē kule kukentaak.

<sup>27</sup> Nteenee kyōōnyōōru :akweek Tāmirmiryoonoo king'ooobēēnook :Yēesu. Yoo miitē :Tāmirmiryēēt āriing'woong', mēēbērē ōtiyēē keyy kāānēētēywēēkaab biich buch. Nteenee nyēē inēētook kurubta keyy āk kiy ake tukul nyēē yēmāktōōs, ku Tāmirmiryēēt. Inee :nyoo manta

---

**2:19** Yēyuut. 20:30    **2:20** 1Yoowa. 2:27    **2:22** 1Yoowa. 4:2-3;  
2Yoowa. 7    **2:23** 1Yoowa. 4:15; 2Yoowa. 9    **2:24** 1Yoowa. 2:7  
**2:25** Yoowa. 5:24

āmāng'wiiynānē. Kunyoo, orub kāānēētēywēēkaab  
Tāmirmiryēēt ānkōōkiilchi Yēēsu.

<sup>28</sup> Kunyoo ii, biikyuu, ōkiilchi Yēēsu, sukung'eet  
kēētinyē man nyēē -mākēēmuuytōōsii ām taay-  
eenyii ām bēsyēēt nyoo chōōnēē.

<sup>29</sup> Kuu yoo ōnkētē kule churtaat :Yēēsu, ōnkēt  
naas kule chii ake tukul nyoo yēyē kiyēē churtaat  
kubo :nyoo Yēyiin.

### 3

#### *Ōbuur kuu wōloo ibuurtooy :lōkōkaab Yēyiin*

<sup>1</sup> Chāmēēch sōō, :Yēyiin nyēē tyaa kut /  
kēēkuurēēch kule lōkōkaab Yēyiin. Ānku man,  
kēēyēku cheechii. Kiito nyēē yēyē biiko alak  
simēēnkētēēch ku kule -mēēnkētē :icheek Yēēsu.

<sup>2</sup> Chōōrōōnuutēkyuu choo āchāmē, kāākēyēku  
lōkōkaab Yēyiin ānkoo toombo kutook mbo kule  
+mākēyēku nee lētuunoo. Nteenee, kiinkētē kule  
yoo kēyēēw :Yēēsu, +makeekerkeyiitu āk inee ku-  
uyu +makeekas inee kuu wōloo wuunto.

<sup>3</sup> Chii ake tukul nyoo boontēē ng'ālyoontooni  
mooyēēt, kōōbuurē ām soboonto nyēē tiliil kuu  
wōloo wuunto :Yēēsu.

<sup>4</sup> Chii ake tukul nyoo yēyē ng'ōōki, kāākwiiiri  
:nyoo kiruutēkaab Yēyiin. Kubooyiit man ng'ōōki /  
kyiiri kiruutēkaab Yēyiin.

<sup>5</sup> Nteenee, ōnkētē kule kichō :Yēēsu  
sichokōōbuuktoowēēch ng'ōōkiswookikyoo,

---

**2:27** Yoowa. 14:16, 26    **2:28** Yoowa. 15:4-5; 1Yoowa. 3:21    **2:29**  
1Yoowa. 3:7, 10    **3:1** Yoowa. 1:12; Room. 8:14-17; 1Yoowa. 3:10;  
4:6    **3:2** 1Kōōr. 13:12; 2Kōōr. 3:18; Filib. 3:21; Kolos. 3:4



ānkōōnkētē :akweek mbo kule mātinyē :Yēesu ng'ōōki ake tukul.

<sup>6</sup> Chii ake tukul nyoo kiilchinē Yēesu māyēyē ng'ōōki. Nto nyoo yēyē ng'ōōki -mēēnkētē :chiichoo wōlēē wuu :Yēesu.

<sup>7</sup> Biikyuu, -mookany /kiiberbeeraak. Chii nyoo yēyē kiyēē mächē :Yēyiin ku churtaat :nyoo kuu yoo churtaat :Yēesu.

<sup>8</sup> Nto nyoo yēyē ng'ōōki, kubo :nyoo Kibrōkōsyoontēēt, kuuyu chōōnēē :ng'ōōki Kibrōkōsyoontoonoo nyoo kiikuyeyaan ng'ōōki kung'eetee kēny. Nteenee kichōōnii :Lakwataab Yēyiin chokooburyeet yiisyēētaab Kibrōkōsyoontēēt.

<sup>9</sup> Māmii :chii nyēbo Yēyiin nyēē tāsē taay kuyēyē ng'ōōki yoo miitē :Yēyiin āriinyii. -Mēēmuuchē kuyey :chii nyēbo Yēyiin ng'ōōki.

<sup>10</sup> Mii :ng'ālyoo yu nyēē /kiinkētēē kule lōkōkaab Yēyiin :chu, nto choo kubo Kibrōkōsyoontēēt. Chii ake tukul nyoo māyēyē kiyēē churtaat, kumābo :nyoo Yēyiin. Wuu nyooto mbo ām wōlēē mii :chii nyoo mächāmē ng'eetaabkaamet.

*Mächē kēēchoomtōōsii kuu wōloo chāmtēēch :Yēesu*

<sup>11</sup> Ng'ālyoo nyēē kyookasaanu ku kule, mächē kēēchoomtōōsii.

<sup>12</sup> -Mookany keekerkeyiitu ākoo Kaayin nyoo kibo Kibrōkōsyoontēēt, nyoo kibārē ng'eetaabkaamet. Kibārchi nee ng'eetaabkaamet?

---

**3:5** Yoowa. 1:29; 2Kōōr. 5:21; 1Bēt. 2:24; 1Yoowa. 1:7, 9; 2:2, 12, 22; 3:18; 4:10    **3:6** Yoowa. 15:4-5; 1Yoowa. 3:9; 5:18    **3:8** Mat. 12:26-29; Yoowa. 8:44    **3:10** 1Yoowa. 2:9, 29    **3:11** Yoowa. 13:34; 1Yoowa. 4:11

Kibar kuuyu kimiyootēch :ātēbuutēkyii nteenee ki kārōomēch chēbo nyiin.

<sup>13</sup> Kunyi ii, mbo ng'eetaabiya, -mōōlātē yoo kāwēchook :biiko ām kōōrooni.

<sup>14</sup> Kiinkētē kule kookeekwaanee wōlēē mii :meet ankookeeyitu wōlēē mii :soboonto. Kiito nyēē kiinkētēē ku kule kēēchāmē mbo ng'eetaabiya. Chii ake tukul nyoo wēchē ng'eetaabkaam, tākumii :nyoo wōloo mii :meet.

<sup>15</sup> Chii ake tukul nyoo wēchē ng'eetaabkaamet, ku miyaat :nyoo kuu rumiin. Ābērē ōnkētē ku-booyiit man kule mātinyē :rumiintō \*soboontaab kibchuulyo.

<sup>16</sup> Kiyēē kōōnēēch kiinkēt wōlēē wuu :chamateet ku kule kiikooyto :Yēēsu soboonnyii kubo acheek. Kunyoo, mākwēēch nkacheek kiikooytooy soboonwēkyoo kubo mbo ng'eetaabiya.

<sup>17</sup> Yoo boonto :chii tukuukyii ānkukāsē kunyālilē :ng'eetaabkaamet āmāriirēē nyiin ii, kōōmuuchē kule nee kuboonto :chiichoo chamateetaab Yēyiin?

<sup>18</sup> Biikyuu, -mookany kiiyiilē kuutuweek buch kule kēēchoomtōōsii, nteenee māchāktōōs kiiboornēē chamataanaa yēyuutēkaab manta.

<sup>19-20</sup> Yoo kēēyēyē kuu nyooto, kiinkētēē yooto kule kēēbooyē manta. Yoo kāmwooy :kāāsōōtēywēēkyoo kule -mākēēboontē manta, okany kēēyisu kāāsōōtēywēēchoo yoo mēēmiitē taayeetaab Yēyiin. Māchāktōōs kēēmwooyē kule wōō :Yēyiin kusiir kāāsōōtēywēēkyoo ānkōōnkētē :inee kiy ake tukul nyēē kēēyēyē.

---

**3:12** Toowu. 4:8; Yuuta 11    **3:13** Yoowa. 15:18-19    **3:14** Yoowa. 5:24    **3:15** Mat. 5:21-22; Ng'oong'. 21:8    **3:16** Yoowa. 15:13; Kala. 1:4    **3:17** Kiruu. 15:7    **3:18** Yāāk. 2:15-17

21 Chōōrōōnuutēkyuu, yoo kāmwooy :kāāsōōtēyewēkyoo kule kēēboontē man, +mākiiyoong'iisye taayeetaab Yēyiin nyēē māmii :muyātēēt

22 ānkēēnyōōru kiy ake tukul nyoo kēēsoomē, kuuyu kēērubē mākuutēkyii ānkēēyēyē kiyēē ing'erēēchē inee.

23 Mākuutyēētaab Yēyiin ku kule, māchāktōōs kiiyēnchinē kule Lakwataab Yēyiin :Yēesu ānku Kāārārōōkiintēēt. Māchāktōōs kēēchoomtōōsii kuu yoo /kēēmwooytoowēēch.

24 Biiko choo rubē mākuutēkaab Yēyiin :chēē kiikunoomnyo āk Yēyiin. Kiyēē kiinkētēē kule kēēyēku akeenke āk Yēyiin ku Tāmirmiryēēt nyoo kiikurōōbwēēch.

## 4

### *Ōriibēē keey biiko choo mātinyē manta*

1 Chōōrōōnuutēkyuu, kookukwaanaat :biich chēē chaang' chēē yibē keey kule \*wōōrkooyikaab Yēyiin. Kunyoo, -mōōyēnchi ng'al alak tukul choo kookas. Nteenee, ōrōōtootē nyēē karaam sōōnkēt yoo kwoonēē man wōlēē mii :Yēyiin.

2 Okany āboorwook wōlēē sōōnkētitooy biiko chēē boonto Tāmirmiryēētaab Yēyiin. Chii ake tukul nyoo chāmtooy kule kichō :Yēesu Kiriistō kōōrēēt kuu chii, kuboonto :chiichoo Tāmirmiryēētaab Yēyiin.

3 Nto chii ake tukul nyoo māchāmtooy kule wuu nyooto, mābo :nyoo Yēyiin nteenee kwiiliintēētaab

---

**3:21** 1Yoowa. 2:28; 4:17    **3:22** Yoowa. 15:16    **3:23** Yoowa. 6:29; 13:34    **3:24** Yoowa. 15:4-5; 1Yoowa. 4:13    **4:1** Mat. 7:15; 1Tēēs. 5:21; 1Yoowa. 2:18    **4:2** Yoowa. 1:14; 1Kōōr. 12:3

Kiriistō. Ābērē kyookas kule mākuchō :Kwiili-intēetaab Kiriistō, nteenee kookukwaanaat mbo :alake kēny.

<sup>4</sup> Biikyuu, ōbooyē :akweek Yēyiin. Ky-oobiirte choo kwiilē Kāārārookiintēēt kuuyu Tāmirmiryēetaab Yēyiin nyoo ōboontē :akweek ku wōō kusiir nyoo bāwu tāmirmirook choo miyootēch choo iwārē biiko ām kōōrooni.

<sup>5</sup> Bo :kwiilōōtichoo kōōrooni. Kunyoo, ng'āloolootē ng'al chēē rubtooy keey āk soboontaab kōōrooni ānkukāsyinē :biikaab kōōrooni.

<sup>6</sup> Nteenee kēēbooyē :acheek Yēyiin, nto nyoo chāmē Yēyiin kukāswēēch. Nto nyoo mābo Yēyiin, kumākāswēēch. Kēēlooto :nyēē kiinkētē tāmirmiryēēt nyēbo manta ākoo nyēbo ng'wiinyan.

### *Chamateetaab Yēyiin*

<sup>7</sup> Chōōrōōnuutēkyuu, okany kēēchoomtōōsii kuuyu toowunēē :chamateet wōlēē mii :Yēyiin. Chii ake tukul nyoo chāmē ake, kubo :nyoo Yēyiin ānkōōnkētē Yēyiin.

<sup>8</sup> Nto nyoo māchāmē ake, kumēēnkētē wōlēē wuu :Yēyiin kuuyu Yēyiin ku chamateet.

<sup>9</sup> Kiiboorwēēch :Yēyiin chamateenyii yu kikōōnu Lakwanyii akenke baateey kuchō kōōrēēt sukung'eet kēēsobchē kubununēē Lakwanaa.

<sup>10</sup> Chamataanaa kumēēbērē acheek :chēē kikeecham Yēyiin, nteenee kichameech :Yēyiin kut kukōōn Lakwanyii kuyēk kōrōsyoo / sikēēnyōōwēēch kaat ām choolwookātēenyoo.

11 Chōōrōōnuutēkyuu, kuuyu chāmēēch :Yēyiin miisin kuu nyooto, kumākwēēch nkacheek kēēchoomtōōsii.

12 Ankoo māmii :chii nyēē kiikukas Yēyiin, nteenee yoo kēēchoomtōōsii kēēboontē keey Yēyiin ankumakuchurta :chamateenyii ām wōlēē kēēmiitē.

13 Kiyēē kiinkētēē kule kēēyēku akeenke āk Yēyiin ku Tāmirmiryēēnyii nyoo kiikukōōnēēch.

14 Kookeekasee :acheek koonyekyoo ānkiibooru kuboyiit man kule kōōkukōōn :Baaba Lakwanyii chokooraraach kōōrēt.

15 Yoo kachamta :chii kule Lakwataab Yēyiin :Yēesu, ku akeenke :chiichoo āk Yēyiin.

16 Kiinkētē :acheek chamateet nyēē boon-tēēnēēch :Yēyiin ānkiikoosēē keey chamataanaa.

Chamateet :Yēyiin. Chii ake tukul nyoo kiilchinē chamateet, kiikunoomnyo :nyoo āk Yēyiin.

17 Yoo kēēboontē chamateet ānkiibuurē kuu wōloo kiibuurtooy :Yēesu ām kōōrēt, kēēmiitē kiibooru chamateet nyēē churtaat. Yooto nanyuun, -mākēētinyē muyāt ām bēsyēēt nyoo /kiitiilchinē biiko ng'aleek.

18 Māmuyē :chii nyoo tinyē chamateetaab Yēyiin kuuyu kwētē :chamateet nyēē churtaat muyātēt. Yoo kāmuyēē :chii /kiing'woonchi, kōōbooru :yooto kule mānāākich :chamateetaab Yēyiin nyēē boonto.

19 Kēēchoomtōōsii kuuyu kisimkuchameech :Yēyiin.

---

4:11 Yoowa. 13:34; 1Yoowa. 3:11; 4:21; 2Yoowa. 5 4:12 Yoowa. 1:18; 1Yoowa. 2:5; 4:17 4:13 Yoowa. 14:16; Room. 8:4-6, 9, 14  
4:14 Yoowa. 15:27; 4:25 4:15 1Yoowa. 2:23 4:16 Yoowa. 15:4-5 4:17 Yoowa. 3:18; 5:24-25; 1Yoowa. 4:12; 3:21

<sup>20</sup> Yoo kāmwooy :chii kule chāmē Yēyiin āmāchāmē ng'eetaabkaamet, ku ng'wiin :chiichoo. Yoo māchāmē :chii ng'eetaabkaamet nyoo kāsē ii, makucham kule nee Yēyiin nyoo manaakas?

<sup>21</sup> Mākuutyēēt nyēē kikōōnēēch :Yēyiin ku nyi: Māchāktōōs :chii nyoo chāmē Yēyiin kuchāmē nki-nee ng'eetaabkaamet.

## 5

*Tinyē soboonto :chiito nyēē kiikuchamta Lakwataab Yēyiin*

<sup>1</sup> Chii ake tukul nyoo chāmtooy kule Kāārārōokiintēēt :Yēesu, kubo :chiichoo Yēyiin. Nto nyoo chāmē kwaaniitaab leekweet, kuchāmē mbo nkinee leekweet.

<sup>2</sup> Kiinkētē kule kēēchāmē lōkōkaab Yēyiin yoo kēēchāmē Yēyiin ānkēērübē mākuutēkyii.

<sup>3</sup> Kiyēē ibooru kule kēēchāmē Yēyiin ku kēēriib mākuutēkyii, āmānyikisyēēch :mākuutēchoo.

<sup>4</sup> Chii ake tukul nyoo bo Yēyiin, kubiirtooy miyootyēēt nyēē mii kōōrooni. Yoo kakiikaasee keey Yēyiin, +mākiibēl kōōrēēt.

<sup>5</sup> Ng'oo :nyēē isyēēntooy kōōrēēt ēē? Nyēē isyēēntooy ku nyoo chāmtooy kule Lakwataab Yēyiin :Yēesu.

<sup>6</sup> Yu kichōōnii :Yēesu Kiriistō kōōrēēt, kibununēē bēēko āk korotiik.\* Mēēbērē kibununēē bēēko

**4:20** 1Yoowa. 2:9    **4:21** 1Yoowa. 4:11    **5:1** Yoowa. 4:25    **5:3** Mat. 11:30    **5:4** Yoowa. 16:33    **5:5** Room. 8:37-39; 1Yoowa.

4:4    \* **5:6** Ibooru :ng'ālyoontēēt 'korotiik' ām yu kule 'meet'. Isōōtē :biiko alake kule ibooru :ng'ālyoontēēt 'bēēko' 'kwootēēk' kuu yoo iboorunoot ām Yoowaana 3:5, nto alak, kōōsōōtē kule ibooru 'bēēkaab bātisāniisyēēt'.

baateey, nteenee kibununēē bēēko ākoo korotiik. Mwooyē :Tāmirmiryēēt ng'aleechu, ānkumwooyē :Tāmirmiryēēt kiyēē bo man.

<sup>7</sup> Miitē :tukuuk sōmōku chēē iboorwēēch kule kichō :Yēesu kuu chii.

<sup>8</sup> Tukuuchoto ku: Tāmirmiryēētaab Yēyiin, bēēko āk korotiik. Ibooru :tukuuchu sōmōku kiito akeenke.

<sup>9</sup> Yoo kēēchāmē kiyēē mwoowēēch :biiko ii, +ma-keecham sōō, nyēē tyaa kiyēē mwooyē :Yēyiin kurubta keey ākoo Lakwanyii!

<sup>10</sup> Chii ake tukul nyoo chāmtooy Lakwataab Yēyiin kōōnkētē man kule inee :nyooto. Nto chii nyoo māchāmtooy ng'aleechu, kumwooyē :nyoo kule ng'wiin :Yēyiin kuuyu manaachamta kiyēē mwooyē :Yēyiin kurubta keey ākoo Lakwanyii.

<sup>11</sup> Kimwoowēēch :Yēyiin kule kiikukōōnēēch \*so-boontaab kibchuulyo. Kēēnyōōru soboonoto kubununēē Lakwanyii.

<sup>12</sup> Chii nyoo boonto Lakwataab Yēyiin kutinyē soboontaab kibchuulyo. Nto nyoo māboonto kumātinyē soboonoto.

<sup>13</sup> Āsirwook akweek choo ōkoosēē keey Lakwataab Yēyiin ng'aleechu sōōnkēt kule ōboontē so-boontaab kibchuulyo.

### *Ng'ālyoo nyēē /kiiwoong'tēē*

<sup>14</sup> Kēēboontēē mooyēēt kule yoo kēētēēbē kiyēē chāmweēch :Yēyiin, mākukāswēēch.

15 Yoo ākoo kiinkētē kule kāsweēch ām kiy ake tukul nyoo kakeesaay, kiinkētē ām yooto kule kēēnyōōru kiyēē kēētēēbēē.

16 Yoo ikāsē kuyēyē :ng'eetaabkoomēt ng'ōōkisto nyēē -mēēsākyinē kōōboot soboontaab kibchuulyo, isaay Yēyiin kunyōōchi kaat. Yooto, mākōōkoochi :Yēyiin chiichoo :soboontaab kibchuulyo. Mii :ng'ōōkisto nyēē yēyē chiito kōōboot soboontaab kibchuulyo. Mēēbērē kāāmwoowu kule isaay ām ng'ōōkisto nyēē wuu nyoo.

17 Miyaat :ng'ōōki ake tukul. Nteenee, mii :alake chēē māyēyē chii kōōboot soboontaab kibchuulyo.

18 Kiinkētē kule mēēbērē tāsē taay :chii nyēbo Yēyiin kuyēyē ng'ōōki. Riibē :Lakwataab Yēyiin chiichoo nyēē mākooy kutiiny :Kibrōkōsyoontēēt.

19 Kiinkētē kule kēēbooyē :acheek Yēyiin. Nteenee bāwu :Kibrōkōsyoontēēt kōōrēt.

20 Kiinkētē mbo subak kule kiikuchō :Lakwataab Yēyiin ankiikuyeyeech kiinkēt Yēyiin nyoo manta. Kēēyēku cheechii kuuyu kēēbooyē Lakwanyii. Kubooyiit man :inee ku Yēyiin anku soboontaab kibchuulyo.

21 Biikyuu, kāāmwoowook, osaanee keye kiy ake tukul nyēē imuuchē kootabaaneenaak wōlēē mii :Yēyiin.

---

5:15 Yoowa. 15:16    5:15 Määrkō 11:24    5:16 Määrkō 3:28-29

5:18 Yoowa. 17:15; 1Yoowa. 3:6    5:19 Yoowa. 12:31; Kala. 1:4

5:20 Yoowa. 1:14, 18; 17:3; 20:28    5:21 1Kōōr. 10:14; 1Tēēs. 1:9



**Biibilya Nyēē Tiliil**  
**New Testament in Sabaot (KE:spy:Sabaot)**

copyright © 2011 Wycliffe Bible Translators, Inc.

Language: Sabaot

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9966002030

**The New Testament**

in Sabaot

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
c68c9dca-518f-544b-a52e-82240cf64928